

In mais da pais

Las lingias grassas e finas dal favrer 2021

DAVID TRUTTMANN/FMR

Er quest mais da favrer è stà plain da muments: muments da gust e frust, muments per tegnair en memoria e muments per emblidar. Prendain damai peda in mument!

Il famus artist Andy Warhol sto avoir ditg ina giada che mintgin haja en sia vita in mument da gloria, silmain 15 minutas. Insumma, quest mais han las dunnas svizas gè lur mument da gloria, il giubileum da 50 onns dretg da vuschar. L'entir pajais ha discutà en quell'ocasiun davart egualitad da las pajas e davart quotas da dunnas en la politica. Insumma, tut ha cuzzà dapli che las 15 minutas da Warhol. Damai, ditg avunda. Uschia che ussa pudain nus atgnamain puspè metter ad acta quellas tematicas per ils proxims 50 onns e turnar tar il courant normal, tar il courant masculin.

Per exempel tar l'armada svizra. Quella avess propi gè ses grond mument avant passa in mais. Finalmain avess ella gè l'ocasiun da mussar ch'ella saja – tenor in dictum da l'antierur schef da l'armada, Ueli Maurer – la «meglra armada dal mund». Ella

ha numnadamain dà a 5000 da 12000 recruts il «Marschbefehl» online. Vul dir ch'ils giuvens avevan da cumenzar lur recruta en il homeoffice. Ma il mument decisiv, cura che tut ils giuvens vulevan s'annunziar online, ha la software da l'armada dà si il spiert. Uschia che millis eran a chasa vi da spetgar. Insumma, tgi che ha fatg la recruta, quel sa che quai correspunda detg bain a la recruta reala. Era en la caserna èsi da far surtut ina chaussa: spetgar, spetgar e spetgar da vegnir mif.

La plaiv da Breil, cun sia paraid alva en baselgia, ha gè las davosas emnas perfin plirs muments spinus. Per ils responsabels hai numnadamain dà in u l'auter sanctus giu da las chanzlas ed or da la Val Sumvitg. La dumonda è gea detg simpla: Vuless ins laschar crear l'enconuscent artist Robert Indermaur in grond maletg mural sin il mir alv a Breil u betg? – Però sche parochianas e parochians sa decidan cunter, alura vegn Robert Indermaur a stuair midar ses num: Robert «Nebendermaur» ubain «Nichtmehrindermaur».

As regurdais era vus forse dad in u l'auter mument d'uffanza, cura che vus avais propi dà

grondischma fadia cun in dissegn, cun ina lavur u cun in text. E gea, il sulet che vus spetgavas en in tal mument era ina pitschna renconuschientscha, in segn, in grazia, in bravo, in splatsch sin la spatla. Be ina pitschna atenziun da bab u mamma u da la scolasta. Però na, i n'ha dà nagin splatsch, gnanc in bravo, simplamain nagut. As regurdais forse dad in tal mument? – Sche gea, alura savais co ils Caduffs, Peyers e Cavigellis da la regenza grischuna sa sentan quests dis, la fin da favrer 2021. Pertge? Perquai ch'els han atgnamain fatg tut endretg: Els han serrà si sco emprims las ustarias, els han organisa e pajà tests da massa, els èn vegnids da sbassar massivamain las infecziuns dal coronavirus ed els han sviluppà scenaris co ins pudess ussa avrir las ustarias. Ed els avessan spetgà da Parmelin e Berset mo ina pitschna renconuschientscha, in bun pled, in bravo, in splatsch sin la spatla. Però na e madinà, si da Berna è be vegnì ina reprimanda setga da serrar las terrassas. Propi per cridar.

Ed en sasez avessi dà blers muments da rir durant quest mais. I fiss stà tschaiver. Eba: I fiss! Per fans dal tschaiver è l'annullaziun sa chapescha stada in grond

frust. Però buccas nauschas pretendan ch'il tschaiver dal favrer 2021 saja stà il pli bel insumma: Igl è stà in mais cun bleras mascras, sco adina, però questa giada senza confettis e guggas.

Intgins lecturs ed intginas lecturas da La Quotidiana vegnan esser stadas schoccadas in mument vers la fin da quest mais. Sin il frontispizi da la gasetta interrumentscha steva en parada in grond dildo, in dildo interrumentsch. In scrinari dad Ardez producescha numnadamain tals «termagls erotics» or da lain ed als dat lura nums tenor idioms e dialects rumantschs: «Vallader», «Sursilvan», «Sutsilvan», «Tuatschin», «Puter» e «Jauer». Però il scrinari ha emblidà dus models impurtants: ils models «Surmiran» e «Rumantsch grischun». I sto esser ch'il scrinari aveva difficultads da sa decider tranter in u l'auter, sco las scolas dal Grischun Central l'onn passà.

Tut auters models han procurà quest mais per in mument istoric en la lung'istorgia da la democrazia grischuna. Durant onns ed onnorums han las forzas decisivas en la politica grischuna cum batti a tut pudair d'introducìr il sistem da proporz per l'elecziun da deputadas e deputads. Però suenter ina brava bastunada si da Losanna dal Tribunal federal ha la politica grischuna stuì ir anc ina giada sur ils cudeschs. Ed ussa, finalmain, suenter tractativas e pirluetas vi e nà, para da sa cristallisar ora in model favurit, in model da proporz, il model C. Bain cler che quel vegn favurisa ussa, quel bustab è gea vegnì liber dacurt tar ina partida che na vuleva betg pli savair novas dal C.

Egea, suenter il tschaiver datti gia bainprest il proxim mument da gloria culturala en il Grischun: il Chalandamarz. Ma er quest onn èsi da duvrar il cundiziunal: I fiss Chalandamarz! Igl è propi da cridar sosas larmas che l'usit per scurrentar l'enviern n'ha betg lieu. Però guardain er quell'annullaziun da sia vart positiva: Sch'i na dat betg Chalandamarz, alura na svanescha er betg la naiv. Uschia ch'ils territoris da skis pon restar averts. Ed il Grischun po lura finalmain avrir sias terrassas d'après-ski durant il zercladur, fanadur ed avust.

Il mais da pais

(fmr/dat) Tgeninas èn stadas las lingias grassas e finas dal mais passà en Rumantschia, en il Grischun ed insumma? Quai sa dumonda la redacziun da la FMR mintga fin dal mais. Tge paisa e tge paisa mo in zichel? Nus laschain repassar schabetgs, da in survista casuala ed comentain quai cun in surrir. Mais per mais illustrescha il Bregagliot rumantsch Jon Bischoffil «mais da pais» cun in schurnal grafic.

